

18.04.18

**ზ. ჭიაბერაშვილი.** მოგესალმებით, კოლეგებო, ღრმად ვარ დარწმუნებული, რომ, როდესაც თქვენ ქუთაისში სესიის დაწყებისათვის თბილისიდან მოვემგზავრებით, რა თქმა უნდა, გზის ორივე მხარეს ვაკვირდებით, როგორ მიდის სასოფლო სამუშაოები მთელ საქართველოში, იმიტომ, რომ ჩვენ ყველას ძალიან კარგად გვესმის, ეს სჭირდება არა უბრალოდ, ზოგადად ქართულ ეკონომიკას, არამედ ეს არის ძალიან ბევრი ოჯახისათვის შემოსავალი და სამწუხაროდ ვხედავთ, რომ ძალიან ბევრი მიწაა, ძალიან ბევრი ფართობი არის დაუმუშავებელი, გუშინ საქ-სტატმა გამოაქვეყნა მონაცემები, სადაც ჩანს თუ როგორ იკლებს წლიდან წლამდე დამუშავებული მიწის ნაკვეთების ფართობი და ეს ძალიან დაბალ ნიშნულზე 2017 წელს 215 ათას ჰექტარზე დავიდა. სამწუხაროდ, ამიტომ როცა ამ დარბაზში ვიკრიბებით კარგად უნდა გვესმოდეს, რომ ეს არის ჩვენი მოქალაქეების ძირეული პრობლემა, სოფლად მცხოვრები ადამიანი, რომ მიწას ვერ ამუშავებს, ჩვენ პირველ რიგში უნდა ვფიქრობდეთ იმაზე, რატომ ხდება ეს და სხვა მონაცემს გაგაცნობთ, წლიდან წლამდე 2013 წლიდან მოყოლებული, სოფლის მეურნეობის გამოშვება ანუ ნაწარმოები პროდუქცია წლიდან წლამდე იკლებს, 2017 წელს ჩვენ პირიქით გვქონდა არა ზრდა, არამედ მინუსებში წავედით. ეს ქართული ოცნების მმართველობის რეკორდია, რაც სამწუხაროდ გამოქვეყნდა. მაგრამ, გამოსწორების არანაირი ნიშანწყალი არ ჩანს, სამწუხაროდ, ქართულ ოცნებას ახასიათებს დაამყაროს უარყოფითი რეკორდი და მომავალ წელს ის კიდევ უფრო გააუმჯობესოს. რა არის მიზეზი, რომ დამუშავებული მიწის ფართობები მცირდება? ორი ძირეულ პრობლემას გეტყვიან თქვენ თუ ნებისმიერს, საქართველოს ნებისმიერ სოფელში გაივლით, ეს არის, რომ ხალხს არ მიუწვდება ხელი ტრაქტორზე, ტექნიკაზე და მეორე, კიდევ უფრო ძირეული პრობლემა ეს არის, გაძვირებული საწვავი, რაც პირდაპირი შედეგია აქ, ამ დარბაზში 2016 წლის დეკემბერში მიღებული გადაწყვეტილებისა, როდესაც თქვენ გაზარდეთ აქციზი და ხელი შეუწყვეთ საწვავზე ფასების ზრდას, დღეს ქართველი გლეხისათვის, ქართველი მეურნისათვის, სოფლად მცხოვრები ადამიანისათვის საწვავი არის იმდენად გაძვირებული, რომ ეს არის ძირეული პრობლემა, რატომაც ვერ ამუშავებს ჩვენი სოფლის მოსახლეობა



მის ხელთ არსებულ მიწებს და ზოგადად ფასების ზრდა სურსათზე, მედიკამენტზე, ეს არის, რაც მძიმედ აისახება ჩვენს მოქალაქეებზე. კარგად რომ გესმოდეთ ის სიღუბე, რაც ჩვენს ქვეყანაშია, გაგაცნობთ კიდევ ერთ მონაცემს, რაც საქ-სტატმა გამოაქვეყნა, 2018 წლის მარტში, 2017 წლის მარტთან შედარებით საარსებო მინიმუმი საშუალო ოჯახისა კიდევ 12 ლარით გაიზარდა, ყოველთვიურად, ყოველწლიურად ძვირდება ქვეყანაში ცხოვრება და სწორედ ამის გამოა ჩვენი ძალიან მძიმე დემოგრაფიული მდგომარეობა, სწორედ ამის გამოა, რომ ადამიანები ტოვებენ საკუთარ სახლ-კარს და ჩვენი ტკივილი არის არა მარტო დაუმუშავებელი ფართობი, არამედ ამის შედეგი და შედეგი არის ის, რომ ყოველი მეორე და მესამე სახლი, თუკი გავივლით ნებისმიერ სოფელში, რაიონში და ქალაქში, დაცარიელებულია, ხალხი ირჩევს იმას, რომ წავიდეს უცხოეთში და იმუშაოს, ვიდრე სამუშაო ადგილი იპოვოს საკუთარ ქვეყანაში, იმიტომ, რომ „ქართული ოცნების“ პირობებში სამუშაო ადგილები ქვეყანაში არ იქმნება. მადლობა.

